

NIZAKO GOI BILERA. Proposamenak blokeatzeko aukera handiagoa izango du Berlinek, Legebiltzarrean inork baino boz gehiago eskuratu dituelako eta Ministroen Kontseiluan eska dezakeelako erabakiak biztanlegoaren gehiengoaren isla izatea

Alemania atera da indartuta, Ministroen Kontseiluan boto gehiago lortu ez arren

Azkenean ados jarri dira Hamabostak, baina zenbait erabaki 2004ko goi bilera arte atzeratu dituzte



REMY DE LA MAUVINIÈRE / AP

Gerhard Schröder Alemaniako kantzilerrak nekatuta amaitu zuen, besteek bezala, Nizako Goi bilera luzea.

Agentziak | NIZA

Alemania izan da, azkenean, Nizako estatuburu eta gobernuburuaren arteko bileran indartsuen irten den estatu kidea. Izan ere, nahiz eta Ministroen Kontseiluan Frantziak eta beste hiru estatu populatuenean duten boto kopuru bera izango duen (29), aukera izango delako proposamenak onartzerakoan baldintzatzen jartzea alde dauden kideek biztanlegoaren gehiengo, %62a, ordezkatzeko (gehiengo bikoitza). Beraz, nahikoa izango luke bi estatu handiekin ados jartzea erabakia blokeatu ahal izateko, hedapena egitean Europako biztanlegoaren %17 izango baitu.

Gainera Europako Batasunak 27 kide izatean, Alemaniak 99 boto edukiko ditu Legebiltzarreko 732 botoetatik —Italia, Erresuma Batua eta Frantziak 74—, eta betoa jartzeko aukera izango du bai inmigrazioan bai asilo politikan.

Bestetik, Espainiak eta Poloniak populazio kopuru ia berbera izanda —milioi bat biztanleko alde dago—, lehenengoak bi boto gehiago edukitzea kritikatu zuen larunbatean Alemaniak. Azkenean, parekatuta egongo dira bi estatuak 27 botorekin.

Azken unerarte

Nizako goi bilera inoiz baino luzeagoa izan da; izan ere, Hamabostek astelehen goizaldera arte ez zuten lortu ados jartzea, Frantziak hiru proposamen aurkeztu eta gero. Portugal eta Belgika izan ziren azken bi egunetan hitzarmena adosteko zailtasun handienak jarri zituzten estatuak, ez zetozelako bat Ministroen Kontseiluko boto banaketarekin. Kide handienek gehiegizko indarra izango zutela salatzen zuten. Dena den, azkenean onartu zuten banaketa.

Europako Batasuneko kide izateko hautagai diren ekialde eta erdialde Europako estatuak ere ontzat jo zituzten atzo Nizan hitzartutako erabakiak.

(hurrengo orrialdean jarraitzen du)

ANALISIA

■ Jose Mari Pastor

Berlin Europako hiriburu berria

XEDEA • Bukatu da goi bilera eta nork bere irakurketa positiboa egin du, gero bere herriarrei akordioa saldu ahal izateko. Estatu bakoitzak aurretik esandakoa eta ondoren gertatutakoa, baina, ez datoz bat azken orduko adierazpen askorekin. Nizako bileraren helburu garrantzitsua Europako Batasunaren estatuen arteko botere banaketa berria onartzea zen. Xedea bete egin da, nahiz batzuek hori nahi luketen bezain argi azaldu ez. Erabakiei erreparatuta, argi dago Alemania izango dela Nizaren ondoko Batasunaren ardaz. Nizan diplomatiko batek atzo esan

zuen, Europako Legebiltzarra Bundestag bihurtzeko bidean jarri du goi bilerak.

GEROA • Gerhard Schröder izan da garai-
lea Nizan, Alemaniako oposizioak atzo kontrakoa esan arren. Kantzilerrak *fair play* handiarekin jokatu du eta ohorea salbatzen utzi dio sinbolikoki Chiraci. Azken batez, Elmar Brock Europako Legebiltzarreko kide alemaniarrek atzo esan zuenez, garrantzitsua ez zen boto bat edo bi gehiago izatea. Horregatik, boto kopuru berdina izaten segitzearren truke, EBren il-
do berriak zehaztu ditu Alemaniak.

Horren ondorioz, dela Legebiltzarrean, dela Ministroen Kontseiluan ezer gutxi onartuko da aurrerantzean Berlinek bainetik gabe. Gainera, 2004rako beste goi bilera bat eratzea lortu du Schröderrek botere banaketari berriz ekiteko. Oraingon auzi hori azaleratzea lortu du kantzilerrak. Tabua hautsia da eta hurrengoan aukera gehiago izango ditu Alemaniak. Hori pilula mingotsa da askorentzat, baina errealitatea islatzen du. Alemaniarrak ez daude gehiago behartuta Frantziaren banderaren aurrean atzera egitera —behin Kohlek adierazi zuenez— eta erru eta konplexu historikoa baztertu dute euren eskakizunak aldarrikatzeko. Frantziako Gobernuak *egalite* delakoa aipatzen segi dezake etorkizunean, baina EBren ekialderanzko hedapenak argi utzi-
ko du kontua: Berlin da EBko hiriburu berria. Eta Paris, EBko kanpoaldeko hiriburu politena.